

Hida Meeuw

Museo Arqueologico Aruba

15 años Museo Arqueologico Aruba

"Hende tabata biba cu creencia cu e indiannan tabata tin un sorto di kript cu cual nan a traha e inscripcionnan riba e piedranan y cu esakinan tabata keda pa eternidad."
"Laura Wernet-Paskel"

E palabranan aki di Sra. Wernet-Paskel den su bunita obra 'Ons eilandje Aruba' ta reflesho di e fascinacion cu cierto Arubiano y tambe stranhero a mustra pa e cultura Indian di Aruba durante añanan. Pa laga publico mira e hayazgo arqueologico di nos isla, Gobierno a inaugura "Museo Arqueologico Aruba" dia 19 di December 1981. Desde e tempo ey pa awor un di e metanan primordial di Museo Arqueologico Aruba(MAA) ta pa engrandecimento e interes di pueblo di Aruba pa nos historia Indian. Pa logra esaki mester busca informacion tocante e historia Indian di Aruba y transmiti esaki pa publico.

For di 1880 nos sa cu e buskeda di informacion tabata tuma lugar, cuminzando cu pader van Koolwijk, kende a haci e prome excavacion na Santa Cruz. Despues na 1923 e antropologo De Josselin de Jong a excava na e mesun sitio aki. Hayazgonan accidental a haya hopi atencion manera por ehempel esun di un skelet na Malmok na 1942.

Na 1949, Ringma a excava un grupo di Indian derabao di un piedra na Canashito. Awendia nos sa cu e Indiannan aki a biba na Aruba mas di 2000 aña pasa. E forma di deramento na Canashito ta esun di mas bieue cu a yega di haña na Aruba. Despues di un periodo den cual diferente hende a raporta hayazgo arqueologico na Aruba, e

Departamento di Arqueologia y Antropologia di Antiyas Hulandes, di cual e


tempo ey Aruba tambe tabata forma parti, a keda insitui na 1967. Patraha cu e departamento aki a yega Aruba na 1970. Drs. E. Boerstra, kende den e periodo 1974 pa 1983 a haci excavacion arqueologico na diferente parti di Aruba y a co-dirigi Museo Arqueologico. E a publica e informacion acumula den su buki

"De pre-columbiaanse bewoners van Aruba, Bonaire en Curaçao". Durante e periodo aki personanan local manera Sr. Mai Odor, Sr. J. Dania, Sr. M. Angela y otronan tambe a acumula informacion y material. Rapidamente e coleccion den e edificio di Museo na Zoutmanstraat a crece. A modernisa e exposicion cu cual a habrie museo na 1989. E modernizacion aki tabata bao direccion di Sr. Evelino Fingal kende a co-dirigi e Museo desde 1981 y ta director desde 1984.

Durante 1989, MAA cu cooperacion di "Universidad di Leiden" a efectua un excavacion na Malmok. Dr. Aad Versteeg, arqueologo na e universidad menciona, a guia e excavacion aki. Desde 1989 MAA a bin ta eherce un programa di excavacion y otro investigacionnan cientifico pa logra establece mihor posibel e forma di bida di e prome habitantenan di Aruba. Na e mesun tempo a trata di informa publico pa medio di lectura, exposicion y publicacion. For di 1989 pa awor MAA a publica 6 buki tocante arqueologia di Aruba.

Riba tereno di investigacion a estrecha e colaboracion cu Universidad di Leiden y a establece otro relacionnan di cooperacion cu institucionan local y internacional. Na Februari di e aña aki Museo a muda pa e edificio di "Instituto di Cultura" pa asina por laga renoba e edificio den Zoutmanstraat.

Aunke e espacio den Zoutmanstraat a para bira chikito den transcurso di tempo, e edificio aki despues di renobacion lo brinda mas posibilidad na MAA pa cumpli cu su metanan. Pa lora ta trata e aspecto di informacion na publico, MAA ta preparando un exposicion nobo



permanente, cual lo inclui tur e conocimiento cu alogra acumula durante e trabaoan di investigacion mas reciente. E exposicion nobo aki lo habri den e edificio na Zoutmanstraat na aña 1997.

Engrandecimento e interes di e pueblo Arubiano pa su herencia cultural Indian lo sigui ta e meta primordial di Museo den futuro. Si mira bek por bisa cu aunke e interes pa historia Indian y pa Museo a crece, mester traha duro pa sigui concientiza pueblo y e gobernantenan di e importancia di conoce y aprecia nos historia.

A amplia e meta cu cual a funda e museo na aña 1981, esta di ta solamente un lugar di exposicion di obhetonan arqueologico di Aruba.

Den transcurso di tempo MAA a desaroya y awendia ta eherce trabao di investigacion cu e fin di obtene y difundi informacion.

Den e proximo añanan lo traha mas intensivamente riba un otro aspecto importante cual ta esun di conservacion. Tanto material, como sitioan arqueologico, mester keda conserva debidamente.

Museo Arqueologico Aruba su 15 aniversario ta sirbi como un bon ocasion pa tur hende reflexiona riba e hecho cu locual Museo ta maneha y trata na conserva, ta nos patrimonio y esun di nos yunan.

Nos tur mester realisa cu Museo Arqueologico ta di nos y cu e ta reflesha e balor cu nos ta duna nos historia di nos mes origen.

INDIAN NA ARUBA

Publication number 7 di "Museo Arqueologico" ta un buki di cuenta y plachi pa mucha, maestro y mayor. E buki ta skirbi na Papiamentu y Hulandes cu ilustracion preto cu blanco y tambe di color. Central den e buki aki ta e mucha homber Indian "Budui" kende ta biba banda di rooi na Santa Cruz, tempo cu no tabata tin ni auto, ni caminda y ni cas di bloki manera nos conoce awendia. E buki "Indian na Aruba" a nace ora cu un maestra di prome klas kier a bishita "Museo Arqueologico" cu su alumnonan. Cu material fotografico di Museo y informacion di e buki "Toen woonden Indianen op Aruba", juffrouw Mechtild de Wit a traha e buki di plachi y storia, den cual el a conta su muchanan con e prome Arubianonan tabata biba. E muchanan despues di a mira e plachinan y a tende e storia den klas, a mustra

asina tanto entusiasmo den Museo, cu Museo a dicidi di publica e buki aki. Kizas e cos cu a duna personal di Museo mas satisfaccion tabata e balor cu e muchanan aki, di apenas seis aña, a mustra pa e obhetonan. Maske e parti cientifico tabata poco complica pa nan a comprende, e muchanan tabata tin masha admiracion pa e 'hendenan cu a traha tur e potchinan bunita' cual nan a mira den e Museo. Por lesa y usa "Indian na Aruba" pa grandi y chikito y e lo ta na benta desde Januari 1997.

PALABRANAN CU HISTORIA

"Hida" of "Hida Meeuw" kier men "con ta bay"! Den cual idioma? Wel, na 1880 un pader Hulandes, kende su fam tabata 'Van Koolwijk' a bin Aruba. E pader aki a mustra masha interes pa e cultura di e poblacion cu no tabata Europeo. Pader van Koolwijk tabata gusta combersa. Mas importante ta cu e tabata skirbi tur informacion cu e a haña. Asina ela skibi un lista di palabra cu, segun e, tabata pertenece na e idioma di e Indiannan cu a biba na Aruba prome cu e Europeanan a yega.

"Hida Meeuw" ta parti di e lista di palabranan aki. Mester tene cuenta si cu pader Van Koolwijk no tabata un experto di idioma. Tempo cu Van Koolwijk a yega Aruba, ya no tabata papia e idioma di e Indiannan aki na Aruba. Bo kier sa mas di pader Van Koolwijk? Pasa un dia na Museo Arqueologico of na Biblioteca Nacional caminda tin un gran cantidad di informacion tocante e personan interesante aki.



publicacion di Museo Arqueologico Aruba 7
Platen-, voorlees- en leesboek
Buki di plachi, pa kontu i pa lesa

Proximo edicion 17 di Maart 1997

Museo Arqueologico Aruba
J.E. Irausquinplein 2-A Oranjestad, Aruba

con ta bay